

臨榆縣志

卷十八
卷十九

臨榆縣志卷之十八

事實編一

宦績

治天下者絜好惡以同民而已即一邑亦何獨不然果能興養立教鋤莠安良政必洽乎輿情民之愛戴謳思必有不能自己者臨邑宋元以前屬在荒服明爲關城重鎮設衛以治之清改衛爲縣而以旗綠兩營經緯於其間官斯土者自建節分符以至司牧振鐸之職仁聲善政代不乏人雖設施不同而其遺愛不忘則一也民國最尊循吏甘棠雅化必有遠過前人者不禁拭目俟之矣

元

懷閭公皇慶初爲瑞州答魯花赤時海濱縣宣聖廟兵燹後鞠爲茂草代官數十輩咸置弗理公至邑人請之遂慨然興復不十旬而廟告成其崇儒慕義類如此崇祀名宦祠

舊志

明

徐達鳳陽人洪武初以大將軍平定北都後留鎮燕薊以平灤渝關等處土地曠衍乃於古遷民鎮築城置關控制險要更名山海關內外截然屹爲重鎮其西若喜峰古北等隘葺壘築塞衛安軍民在鎮十七年功烈甚偉累官大傅中書右丞相晉爵魏國公追贈中山王謚武寧景泰間衛民請立廟報功巡撫李賓李進等先後請於朝詔報可成化中廟成賜額顯功祠後崇祀名

宦 舊志參畿輔志

費璵定遠人祖遇洪武中爲燕府左相已革府相改獲衛指揮使父肅嗣官卒璵嗣官事成祖靖難功累官都指揮同知鎮守山海關永樂五年召僉事後府六年充副總兵官備倭海上七年征湖廣叛寇八年充總兵鎮寧夏甘肅討平亦令眞巴十年又出甘肅防禦仁宗即位充平羌將軍鎮甘肅尋升右軍都督宣德元年入朝上念璵舊臣累著功名封崇信伯食祿千一百石與世券復出鎮璵性和易善撫士卒守邊二十年塞境寧靜征漢庶人嘗爲先

鋒將佐薛祿有功

府志

王整羽林前衛人正統八年任守備沈毅有謀長於幹濟山海設守備自此始
前此治尙草創規制未備整至次第興舉凡學廟樓櫓及廨舍之屬多所增
建撫士馭下寬而有體軍民畏而愛之祀名宦

楊琚江西泰和人進士天順五年任兵部分司主事公明練達舉措悉中典型
關法自譏察外無所留滯人咸稱便時衛學始建拘行伍子弟充諸生皆以
爲厲己弗樂琚雅意作人士習用變至今士民稱頌不置祀名宦

劉剛山海衛指揮僉事天順間視衛篆以賢稱體統甚嚴每侵晨詣衛公座千
戶以下肅肅雁序咸執屬禮罔敢譁者雖器物食用之細宿購衛中遇上官
至輒出以應不斂諸下於學校以提調自任創建東西廡暨學舍諸生違教
者輒廷責之罔敢不服其公嚴綜密類此祀名宦

狄珍字國賓本衛中右所千戶少時與海鈞蕭公同肄舉子業志趨甚端長承
廕署所篆文雅忠厚歸然爲流輩所推比致仕守關諸公欽其高致咸以賓

禮相遇事鮮過舉身無苟且行初終一節時人稱之祀名宦

張愷字元之江南無錫人由進士宏治二年以兵部主事分司操守清嚴有冰蘖聲關舊法止驗籍與年自是始稽貌以杜詐冒之弊至今因之其待士惠民外內一致雖黠詐者亦不忍欺云祀名宦

黃繡字文卿南直隸靖江人進士宏治五年任兵部分司宅心平恕政尙宜民時關內薪水頗遠居民仰給關外繡給木牌懸之出入樵汲甚便繡有目力一經觀記終莫能眩遇面生冒頂者輒指摘之卒無敢欺啟閉有常期雖祁寒暑雨及他務叢集亦弗爽代去之日男女夾道遮留車馬至不得行後轉巡遼東經此居民猶依依不忍舍云祀名宦

陳欽字亮之浙江會稽人由進士宏治八年以兵部主事分司清簡平易卓有高致終仕無苛擾之令民甚德之遂於詩學雅好吟哦迎養父教諭君於署嘗親侍杖履遊佳山水以娛其志天倫至樂雖塗人咸知歆慕云祀名宦

俱

徐朴浙江上虞人由進士宏治十二年任兵部主事分司性剛嚴莫可犯諸公私巨猾咸斂跡避終代去無敢肆暇則集諸生講課寒暑弗倦

舊職官志註

申寧沂州衛人宏治中爲山海衛守備安靜不擾地方德之陞山東都司以廉

勤勒石於石門路之彰善碑

府志

黃景夔四川酆都人由進士正德十六年以兵部主事分司舊部使與守臣敵體夔至呈部革之始執廷參禮地方薦饑舉賑貸興義倉居民賴以存活者衆禁浮屠巫祝淫祀及燔屍諸敝俗民無敢撓者衛學舊無廩餼夔墾田以租給之暇則親爲校藝課業士風彬彬興起焉祀名宦復建專祠

舊志

王冕字服周河南洛陽人進士嘉靖三年任兵部分司初筮萬安令值宸濠之變招募勇敢繼撫帥進及逆兵岷安慶趨還南昌爲釜魚計冕帥所部遇而擒之遷兵部主事來守關甫五旬值妖卒變作羣醜嘯呼露刃階下侍吏拽之潛避冕正色拒賊以刃脅不屈死之撫臣上其事贈光祿寺少卿祀名宦

舊志參府志

李英江西饒州人歲貢嘉靖間任衛學教授潛心聖賢之學每事務躬行實踐期可盟幽獨尤以師道自任教人不專事舉子業對諸生燕坐談理道辨義利諄諄不倦徒輩有能厚人倫尙義舉者獎進不實口後聞兄訃哀毀踰禮見者感泣因觸時政竟棄官歸當時與胡敬齋先生齊名西江至今推理學必曰胡李云祀名宦

舊志

清淮南王世貞名宦異泉李先生傳李先生者諱英字文華饒之餘干人也嘗自號異泉學者尊稱之曰異泉先生先生少好學念邑中鮮有授禮經者而餘姚多知名士因徒步千里負笈往尋師數年盡得其學歸而試博士弟子他博士弟子無能抗者遂食廩學宮而至省試輒不利先生怡然曰我能工干祿不能工命歸而勤學如初然竟不利五十餘始以貢上春官得教授山海衛山海故中山武寧王達置戍以限遼水爲左輔絡其戍卒即冒青衿而以擊技取大官不甚曉書史先生精心誨之課業之暇相與反覆開諭歸之忠孝禮讓咸彬彬質有其文矣時中貴人瑾用事魚

肉薦紳大夫先生聞而嘆曰逢萌何人哉移書臺使者乞骸骨歸臺使者三挽之不得諸生前後追餞數百里外先生示之書一束曰借我而來偕我而往者此耳因賦詩見志先生歸而道遇寇掠先生橐亡所得僅得其衣冠去先生抵家猶褐裘其壻張僕者藩伯吉子也以父衣冠遺之先生卻弗御曰吾豈倩他人衣冠者先生性友讓其少時與兄弟分財必居少伯兄病疫蚤暮視之無閒或謂疫不虞染耶先生曰疫誠染者吾亦不忍使吾兄獨疫也其後里大饑先生謀賑之不獲徧則捐郭外地爲義塚收醬而瘞之於書好誦小學每謂使我終身行之不旣又好舉趙閱道夜必告天以晝所爲事及司馬君實平生未嘗不可對人言二語宗戚子弟有小不善輒諭之曰得無不可告天乎又曰君實不畏人知若乃畏人知何也以是諸宗戚交相戒爲不善何以面李先生而其弗便先生者謂先生伉不藏人過顧有盜夜穿窬入家人掩而縛之呼請燭先生曰吾代若守縛若取燭已解縛縱使去徐謂家人曰民自急贍死耳一燭而得其人即

縱之何以自新其爲長者又如此先生澹然一切無所嗜好子弟即不布素不敢見也前後邑令謝儀馬津石簡皆清峻鮮所折節獨禮重先生時時造門請質疑難先生亦無所報謝邑令每謂先生跡可數非元旦鄉飲我何能屈先生蓋壽至八十六無疾而終後先生五年所而志山海者以先生爲名宦其又若干年而志餘干者舉先生鄉賢王子曰夫二志者郡邑史其猶行古之道也夫中山武寧王國元勳無兩也先生以一儒官廁名而無愧色餘干有胡居仁伯牛吳聘君而乃舉先生並稱而無輕辭其猶行古之道也夫

葛守禮山東德平人由進士嘉靖十年以兵部主事爲關使者平生敦禮法謹言笑持躬範物一準古道至取予間雖一介不苟關法肅然時典章草昧自是始行鄉飲禮風厲耆德創養濟院著爲令惇獨賴之祀名宦

張倫山西沁水人由歲貢嘉靖十五年任儒學訓導持躬嚴整博學善誨每以聖賢心身正大訓迪士子不屑屑章句間博士俸及祭肉悉捐賑貧生朔望

振鐸諸生執弟子禮毋敢或惰者以故出其門者咸以宦績顯而劉太僕其較著者矣祀名宦

谷中虛山東海豐人進士嘉靖二十七年任兵部主事分司英年及第練達如老吏視關政三年一塵不緇時遼左承平比屋殷富以賤值市馬而西者首尾相望權關者利其稅縱之入中虛獨加厲禁諸販者皆領中官貲久饗倍利一旦失望遂挾巨璫書并祈本兵爲言中虛執如初不爲屈祀名宦

陳綰浙江上虞人進士嘉靖三十五年任兵部主事分司才氣倜儻熟諳邊務下筆輒數千言按之皆中利害切時艱如守邊賑荒諸論薊遼大吏俱屈服時關東西大饑綰疏通關政煮粥哺之民賴全活祀名宦 俱舊志

商誥山東平原人進士嘉靖四十一年任兵部主事分司壬戌歲邊敵數千薄關東鄉民奔避如蟻議者欲閉關誥曰不可是棄萬人命也大開門納之少頃敵攻旱門關甚急誥親巡堞神氣暇整指揮方略勵將士拒堵敵奪氣遁去事聞被賚加秩尋遷薊州兵備祀名宦 舊志參府志

孫應元字華山湖廣承天衛人一作鍾祥人由進士嘉靖四十三年任兵部主事分司長髯方面望之有威器識宏遠當幾立斷素以才名推由戶部曹調任及抵關精明練達事治民安南北敵臺皆其所建尤稱碩畫升永平道仕至山西巡撫祀名宦

王繼祖陝西咸寧人進士隆慶二年任兵部分司坦平簡靜居官隨所蒞皆有冰檠聲時新添參將某有頡頏意繼祖持大體不少借一切饋遺卻之後知河間府以忤撫臣去隨起守南陽陞四川副憲乞歸再起不赴名挂仕籍三十年歷俸僅半之蓋古道自處澹然名利者祀名宦

舊志參府志

戚繼光山東登州衛人隆慶間以勦平倭寇功召入京營練兵尋加少保兼總理鎮守薊永山海等處巡歷各邊相度平險建築敵臺千里森列軍民不病又嘗增餉廩制車戰及火器器械立傳烽制掣旗舉礮頃刻千里百廢俱舉奔走諸將檄飛隨羽至大閱三十萬衆咸遵紀律閱視大臣每以李郭稱之士蠻黃台吉入寇山海遣遊擊張臣敗之於傍水崖在鎮十六年薊東宴然

居民得安耕牧

參畿輔志及府志

張臣山東人隆慶初由延綏入衛授遊擊將軍時黃台吉入寇臣出奇奮勇率所部卒三千扼其吭酋北道窮臣追益迫斬馘無算至石門之傍水崖衆於雲霧中見關帝像酋驚駭競奔墮崖死者數萬遂大創去士民於其地立

關帝廟肖臣像於正殿之西

見碑記

霍鵬井陘人萬歷中武舉歷官都指揮僉事鎮守渝關恤士卒繕城堡有保障功以母老乞歸

高如崧盧龍人萬歷中爲石門路千總泰甯寇花場峪主將陷圍如崧力鬪出入陣中者三敵攢射落馬剖其心而死事聞贈二級世襲指揮同知

俱見畿輔志

孟秋山東茌平人進士萬歷七年任兵部分司研精理學特立獨行蔬布自甘尤嚴義利之辨諸生有志問業者樂於啟發竟日不倦每念邊備日弛少有罰鍰盡捐以置神機火器爲戰守具或迂之答曰此夏官職也時江陵擅政邊帥競以賄進遼左尤狼藉秋當關嚴檢閱因以京察被謫後起用累官尙

寶司少卿祀名宦

參錄府志

王邦俊陝西鄜州進士萬歷十年任兵部主事分司廉靜端嚴寡言笑惟訓課則談笑不厭時嚴禁關法十餘日始啟關民出入頗不便俊復如舊關內外歡甚請建東羅城脩理樓堞至今攸賴祀名宦

舊志參府志

王守道遼東左屯衛都指揮萬歷十一年任山海路參將十二年九月敵侵寧前守道率本路并延綏兵東援遇敵卻之十月敵復合兵夜半直逼關門同延綏將杭大才中軍盛莊列營城東血戰竟日敵失利退去有全城之功祀

名宦

舊志

葉世英字春谷廣寧衛籍浙江寧波人進士萬歷二十四年任盧龍知縣明敏倜儻有應變才二十六年奉調征倭廣兵五千譟變於山海英單騎陳以大義悉撫定之實有全城之功

節府志

吳鍾英陝西高陵人由進士萬歷二十六年任兵部主事分司歲歉值東餉十萬集關下飛輓甚艱鍾英移書當道以折色往民不病飢

舊職官志註

楊植山西陽城人進士萬歷十二年任兵部主事分司清介方正居官三載一切餽遺無受各行俱用時估執法嚴而不苟留心惠養免挂號一城軍民銜感訓誨諸生孳孳不倦操持冰霜後人罕及祀名宦

張時顯江西南城人進士萬歷二十三年任兵部主事分司長於治才精覈整肅重脩關志俱出手裁學識贍雅時征倭總兵陳璘幕下鼓譟賴其撫定一字獲安祀名宦

俱舊志

來儼然陝西三原人進士萬歷二十九年任兵部主事分司端重嚴整時稅璫高淮煽虐厚幣餽遺盡卻之出入不與偕至有害於民者力爲解釋淮亦畏其清鯁不敢縱惡任未久卒於官士民痛之西羅城外龍王廟後建有專祠祀名宦

舊志參府志

朱洪範京衛指揮武進士萬歷三十年任山海路參將才品優長儀表出衆整飭營伍任用賢能值稅監擅權曲爲護持地方得免荼毒且長於吟咏有樽俎折衝之概當年推爲儒將祀名宦

李如檜字太巖山東陽信人由進士萬歷三十三年任兵部主事分司至性孝友廉平涖官坦和待物課士評文如家人父子准舊引填名軫念民瘼時稅璫高淮薑尾鬼厲如檜不吐不茹綽然挽掖及淮稔惡貫盈軍民激變調停息亂拊淮出境一時獲免騷害祀名宦 俱舊志

邵可立陝西商州人由進士萬歷三十六年任兵部主事分司加陞員外郎廉直剛斷遂於理學創文昌書院購古今遺書充之俊彥鼓篋其中面受指畫鄉會兩試獲捷者甚衆值歲饑令屯官清絕戶產置牛具分給婚不舉者衛有布花之施貧不葬者普濟會有棺木之給嘗三劾貂璫四減關稅修鎮東樓工師苦無大木忽海上浮若干至及落成無贏餘者亢陽不雨三禱三應忠清正直格於神祇時咸嘆異之祀名宦 舊志參府志

劉渠字雙泉順天人萬歷四十七年總鎮山海體貌魁岸武藝優長而性情恂恂有類文儒投醪恤士懸榻禮賢嚴禁官價不致擾民有古良將風遷鎮廣寧臨陣戰死祀名宦 舊志

杜松陝西榆林衛人萬歷四十六年總鎮山海秉性忠義氣辟萬人帥兵援遼

渾河大戰死於陣諡忠壯

府志

孫承宗字凱陽直隸高陽人進士廷試第二沈毅豁達天啓間以內閣督師關內設三鎮置營房於城內外軍民異處各安其所捐俸脩學廣科舉額以興人文施穀濟貧惠及百姓三載勞瘁告病回籍崇禎己巳特旨起用匹馬就關躬督士民防守關城賴以保全當多事之際執掌軍務安詳鎮定不動聲色有綸巾羽扇之風祀名宦

陳祖苞浙江海鹽人進士天啓五年任兵部主事分司一日坐堂上忽有羸自關外闖入向堂長鳴苞命人尾之至一家直入掘地得屍廉其圖財致命狀抵罪又四人失路引回關中官欲以奸細論苞持不可得放歸以此致忤罷去東門甕城關帝廟左建專祠肖像後起復歷順天巡撫祀名宦

張春字太字陝西同州舉人天啓間由刑部主事備兵永平一時治政瑋瑋有聲尋轉山石道以執法不阿移病歸崇禎二年復起爲永平兵備收復永灤

嚴禁屠掠全活難民甚衆論功加太僕寺少卿仍請告歸籍再起備兵通州不數月又調永平清兵下大淩河春帥兵救援兵屢被執堅求自盡清主嘉其忠直優養十年春留髮不薙及卒以禮葬之清康熙三年子伸乞骸歸葬准從所請路經山永人皆祖道焚鑼絡繹不絕先是永人聞春死建立專祠四區其德澤入人心如此當春敗績時其妻盡節於永平韓氏樓中春每食必具筯遙邀同飡父忠子孝夫義婦烈皆出性成入名宦仍祀武廟表忠祠

俱舊志參府志

楊葆和雲南大理人由舉人崇禎二年任管關通判爲人端毅正大不附權要勤政惠民知人愛士時儀部余一元初應童子試即以大受相期勉望諄至未幾以忤上官謝病歸祀名宦

舊志

朱梅字海峯遼東前屯衛人崇禎三年總鎮山海厚重渾樸御事精詳先是值廣寧失守邊人要賞士民震駭當事難之時梅爲裨將慨然自任出撫於關東八里舖誓以威靈綏以恩信衆皆帖服羅拜而去關門安堵至招降丁沽